

PLEASE, SAVE THE DATE! || PHAKT

Roazhon, deroù ar bloavezh. E karter ar C'houloumer, nepell eus plasenn Charlez De Gaulle, e kaver un nebeud lec'hioù gouestlet d'an arz a-vremañ. War blasenn ar C'houloumer, etre ar stalioù hag ar sinema, amezek d'un trocher blev, e vez staliet Lendroit, un diskouezva-levrti gouestlet d'an arzoù moulet. Eno e kaver ar mare-mañ *Please, save the date!* savet gant Marie Boivent, kelenner war an arzoù er skol-veur. An diskouezadeg-se a zo un dastumadeg deiziadurioù saver gant un ugent arzour bennak. En o zouez, Claude Closky a embann gant Lendroit un deizadur kenwerzhel, da vrudañ an diskouezva, Matthieu Saladin a sav un deiziadur an emsavadegoù, gant deiziadoù harzoù-labour, reveulzioù pe manifestadegoù taer e plas anvioù ar batromed hag ar gouelioù relijiel, met ivez Brendan Fowler ha Andrea Longrace-White, Harold Ancart, Sophie Naess ha Carmelle Safdie, Marie-Amélie Procher, hag all, a c'hoari gant ar skeudennoù a gaver da gustum war an deizadurioù : bokedoù, maeziadoù, mareadoù ar bloaz, loened an ti, hag all.

Un diskouezadeg fentus a-wechoù, souezhus a-hend-all hag un abeg mat da vont da deurel ur sell d'al levrioù all gwerzhet gant an diskouezva.

Un tammig pelloc'h e kaver un diskouezva all, ar *Phakt*, lec'hiet en ur blasenn guzh eus ar c'harter, e kreizig-kreiz an tourioù. Amañ e vez kentelioù arz evit tud ar c'harter hag er sal gentañ ez eus bet staliet un diskouezadeg nevez ar sizhun dremenet. Hounnezh a zastum oberennoù ar c'henstroll *Le Marché noir*, da lâret eo

arzourien ar pevar strollad a ra war-dro *Le Marché noir*, ur gouel aozet bep bloaz da vare an distro-skol evit diskouez oberennoù grafek savet gant strolladigoù grafourien hag arzourezed Europa. Er *Phakt* e kaver neuze oberennoù savet daou-ha-daou. Pep hini eus an arzourien o vezañ bet o labourat en ur gemer harp war oberenn un den all eus ar strollad. Ar re a anavez labour an dud ne welint netra souezhus met un taol-sell dedennus war stad al labourioù hag an enklaskoù nevesañ graet gante.

